

# Tut che less emprender rumantsch

ANGELICA AUGUSTIN/FMR

■ **Cura ch'il lockdown è vegnì proclamà avant prest in onn, han blers stui pensar enturn. Uschia era la Lia Rumantscha cun ses curs da rumantsch. Quels ha la Lia numnadain entschet a porscher pli e pli en furma digitala dapi il mars 2020. La metoda digitala ha augmentà il dumber dals curs ed ha era purtà novas schanzas.** Uschè spert poi ir. Il 2019 ha la Lia Rumantscha exequì be trais curs online. Tut quels trais curs eran curs privats ed han furmà in project da pilot. La purschida digitala n'era da lezzas uras betg anc accessibla per mintgin, mo per persunas che han dumandà la Lia Rumantscha, sch'i fiss pussaivel dad organisar in curs online. Il 2020 è la Lia alura tuttenina stada sfurzada da porscher la maioritad dals curs online. Grazia a l'experiencescha che ils responsabels han però gia pudì rimnar cun quels trais curs da pilot dal 2019, è la Lia Rumantscha stada pronta cura ch'igl è vegnì serius. Davent dal mument che la purschida online è stada accessibla per mintgin, è il dumber dals curs s'augmentà. Durant il 2020 ha la Lia Rumantscha exequì en tut 118 curs (la maioritad en furma digitala), il 2019 eri anc 76.

## Il svilup

Quest svilup è surtut capità per motivs geografics. Uss èsi numnadain tuttenina era stà pussaivel d'emprender rumantsch senza far il viadi en il Grischun. I deva bain er avant curs ordvart il Grischun, p.ex. da la Migros Klubschule, però forsa fiss er il viadi enfin là stà malcumadaivel u forsa avess ins vulì emprender in auter idiom che quel che vegniva gist purschì en il lieu da domicil. Cun ils curs online è quai tut vegnì blier pli simpel e la Lia Rumantscha porscha ussa surtut dapli curs privats e quai per tut ils idioms e rumantsch grischun. Il 2019 èn vegnids fatgs 12 curs privats (incl. ils 3 online) ed il 2020 42 curs.



**Era jau discurs rumantsch!**

**Corso base di Romancio**

**Sursilvan per principianti con J.-J. Furer dal 13 gennaio 2021 ogni mercoledì alle 18:00 tramite piattaforma digitale**

Corsi Pgi Lia Rumantscha ESPRESSIONE ORALE

Per il mument maina la Lia Rumantscha 33 curs online.

MAD

## Novas schanzas per scholars e scolasts

Purschend curs online, survegn la Lia Rumantscha uss er adina puspè dumondas per curs privats da glied che abitescha en igl exteriur. Tar curs privats èsi perfin pussaivel d'emprender rumantsch nà d'in auter linguatg che dal tudestg. Scolasts che san fitg bain talian u franzos, mainan per il mument era curs privats durant ils quals els instrueschan rumantsch tenor quellas duas linguas.

Pudì sa legrar han surtut era fans dal sursilvan. *Conradin Klaiss* raquinta: «Tge che è per exempel stà ina bella is-

torgia è stada quella dal sursilvan. Magari avain nus gi grev da vegnir ensemen cun trais, quatter participants per far in curs da sursilvan. Uss eran nus vi da far tuttenina grad dus curs online.»

Betg be per ils participants dals curs, mabain era per ils scolasts ha la nova purschida online purtà novas schanzas. I na saja dal reminent betg stà grev da chattar scolasts che èn pronts d'instruir davant lur computers. Sco tar ils scolars, devi era qua glied che n'abitava betg gist là nua ch'i fiss stà d'instruir. E cun dapli interessents dals curs han ils magisters tuttenina era gi la pussaivladad da lavurar dapli. «Nus avain per exem-

pel ina scolasta che fa be quai, quella viva da quai», di Conradin Klaiss.

## Curs per italofons da differentas vals dal Grischun

Per il mument maina la Lia Rumantscha en tut 33 curs (tuts online), dals quals 13 èn curs privats. Sco gia menziunà instrueschan tscherts scolasts da curs privats nà dal franzos u dal talian. Danovmain èsi era pussaivel d'emprender rumantsch tenor il talian en curs publics digital. La Lia Rumantscha ha da curt numnadain lantschà in project ensemen cun la Pro Grigioni Italiano (PGI) per pussibilitar questa purschida extraordinaria. Da preschent vegnan gia manads dus curs da sursilvan e l'avrigl datti anc in curs da rumantsch grischun. Previs fiss stà era mo in curs da sursilvan, ma la PGI ha alura survegnì tantas annunzias che els èn sa decis da far dus curs, in cun otg e l'auter cun nov participants.

## Corona ha promovì l'acceptanza da la metoda digitala

Ins sa dumonda ussa forsa sche questa chausa digitala na fiss betg era stada pussaivla gia avant Covid. Conradin Klaiss di ch'i na saja betg l'idea che saja vegnida cun il lockdown, mabain blier dapli l'acceptanza per la metoda digitala. Sch'i avess dà interessents, avess la Lia Rumantscha fatg attent gia avant il temp da corona sin sia purschida digitala. L'interess è però vegnì e creschì pir cura che la glied è stada sfurzada da prender part als curs da chasa anora. Sco tar autras chausas ha la glied damai puspè ina giada gi da vegnir sfurzada tar lur cletg. I dettia ussa numnadain schizunt participants che prefereschian la purschida online. Da l'autra vart datti natiralmain era scholars e scolasts che spetgan cun brama il mument cura ch'i pon finalmain puspè emprender resp. instruir en ina dretga stanza. Igl ha perfin dà curs digital che la Lia Rumantscha ha gi da terminar perquai ch'ls participants han preferì da betg cuntinuar.